

## Katēns Rainis

Torio aš kaimē babītē Marējuona. Gīvena pas anou katēns Rainis – rēibos, rains kap kuoks tigros. Oustā anuo bova ēlgē, ausis – statēs, vo ēdava par kēima, vēsumet i dongo pakielēs stuora sava oudēga. Anam dēdlē patēkdava lašēnē, pēins ē nomēnē dešra. Tas nakabis islinkdava i kamara ē, tēn pasēkavuojēs, vēskou sujiesdava. Vo babītē pasiosdava – zlastīdavuos, bet na ont tuo raina katēna, vo ont pēimēnātē Bruonioka. Tas vargšos vaikioks vuos spiedava išbiegtē iš kēima, ka Marējuona ožsiosdava. Ons šaukdava biegdams:

– Ne aš tesujiediau dešra, ne aš lašēnius pavuogiau, ne aš pēina ēšgieriau, vo tas bestējē katēns!

Bet babītē nikumet nevierējē, ka Bruonioks saka tēisa...

Vēina gražē rodēns dēina babītē siediejē truobuo, nierē žēimā buočiou vēlnuonas žekēs ē pamatē, ka po āsla pradijē biegiuotē pelēs. Lēipē mitrē babītē Bruoniokou parneštē ton stuora Raini, ka ēšgaudītu ēš truobuos pelēs, bet Bruonātis tuo katēna nerada. Tumet ēšējē ēiškuotē buočios: apējē vēsus pašalius, šaukē vēsuokēs vardās, bet Rainis neatsēlēipē. Tumet bombiedama ēiškuotē katēna ēšējē pati babītē. Ēdama netičiuom pamatē pravēras kamaras doris. No ē kon jus mēslējēt – juk atrada Raini bajiedonti lašēnius. Dešra jau bova apgriaužēs, vo pēina i kamaras āsla išvertēs. Ka pasiota babītē, ka jiemē gvaltas šauktē ē so šlouta katēna po kēima gainiuotēis:

– To bestējē vēins, to tinginī neraliouts, tik lašēnē tau rūp!

Nu tuo laika Marējuona soprata, ka na Bruonioks lašēnius ē dešra vag, vo anuos patiuos katēns, katras no apsējiedēma nabmata ni peliū, katras pradijē po nomus biegiuotē kap kuokēs gaspadēnēs. Ē nu tuos dēinuos babītē katēnou nebdoud nikuokiū lašēniū, ni dešrū, diel tuo nomūs nablēka ni vēinuos pelies, nes Rainis īr priversts pats sau mesuos susērastē. Dabā lašēnēs ē dešra babītē Marējuona palepēn Bruonioka – vo laimings vaikis īr!..

Ē ka pabēng babītē monēi pasakuotē ton sava ēstuerējē, vēsumet atpjaun nomēniu lašēniū ē joukdamuos saka:

– Jiesk, mažieli, jiesk. Čia jug tatās mona Rainē lašēnē īr.